

四庫全書

子部

# 欽定四庫全書

子部  
續名醫類案卷十二

詳校官太醫院醫官臣姜晟

編修臣倉聖脈覆勘

總校官編修臣王燕緒

校對官中書臣劉源溥

謄錄監生臣陳箴

欽定四庫全書

續名醫類案卷十二

錢塘魏之琇撰

飲食傷

實材治一人慵懶飲食即卧致宿食結於中焦不能飲  
食四肢倦怠令灸中脘五十壯服分氣丸丁香丸即  
愈

一人脾氣虛好食冷物不消常覺口中出敗卵臭服草

神丹即愈若服全真金液亦效

原注脾胃既為食所傷不可再施消尅唯

治以溫化則

自健運矣

一人暑月飲食冷物傷肺氣致咳嗽胸膈不利先服金

液丹百粒泄去一行痛減三分又服五膈散而安但

覺常發後五年復大發炎中府穴五百壯方有極臭

下氣難聞自後永不再發

世醫不審病目動云暑月熱氣傷肺一派寒涼致水

氣不消變成

大病原注

汪穎曰一人好食燒鷺炙燻日常不缺人咸防其生癰

疽後卒不病訪知其入每夜必啜涼茶一碗乃知茶能解灸燂之毒也

龔子才治一人勞後喫紅柿十數枚又飲涼水數碗少頃又食熱麵數碗遂心腹大痛診之六脉沉微氣口稍此寒熱相搏所致以附子乾薑肉桂枳實山查神麴義术香附一服立止後渾身發熱又以小柴胡一劑而安

一人臘月賭喫羊肉數斤被羊肉冷油凝結堵塞胸膈

不下脹悶而死諸醫束手診之六脉俱有乃用黃酒  
一大罈煮熱入大缸內令患人坐其中衆手輕輕亂  
拍胸腹背心令二人吹其鼻及將熱燒酒灌之次服  
萬億丸遂得吐瀉而愈

陶節菴治一人患病因食羊肉涉水結於胸中門人請  
曰此病下之不能吐之不出當用何法陶曰宜食砒  
一錢門人未之信也乃以他藥試之百計不効卒依  
陶語一服而吐遂愈門人問曰砒性殺人何能治病

陶曰羊血大能解砒毒羊肉得砒而吐而砒得羊肉

則不能殺人是以此知其可愈

杭州府志

唐守元治一婦人食羊膾呼未及吞而應逾月病發淹及兩年唐曰此必胸有宿物家人曰兩年不食矣曰試以我藥投之既而大吐痰塊中裹羊肉一臠遂愈

平湖

縣志

王海藏治秦生好服三生茶及冷物成積而痼寒脉非浮非沈上下內外按舉極有力堅而不柔觸指突出

膚表往來不可以至數名縱橫不可以巨細壯此陰  
症鼓擊脉也一身流行之火萃於胸中寒氣逼之故  
搏大有力與真武四逆理中等湯九佐以白芍茴香  
使不僭上每日服百九夜八十九至夜汗出而愈

孫文垣治董潯陽年六十七有脾胃疾以過啖瓜果胸  
膈脹痛諸醫不愈脉之寸關弦緊曰病傷瓜果而為  
寒濕淫勝經云寒淫所勝治以辛溫然瓜果非麝香  
肉桂不能消以高良薑香附各一兩為君肉桂五錢



為臣麝香一錢為佐每服二錢酒調下藥下咽胸次  
便寬再服知餓三服而中櫛交接賓客如未病者

馬二尹迪菴年五十五以過食鰻肉卷餅心腹脹痛醫  
不知吐法遽以硝黃下之大便不行脹痛愈甚又用  
木香檳榔丸繼又有下以大小便承氣者十餘日病  
益加便既不行食亦不進小水僅點滴又服白餅子  
五日備急丸三日脹痛遂不可當又服甘遂芫花大  
戟牽牛之屬三日并小便之點滴亦無矣又灸中腕

三十餘壯亦無驗孫至視其色蒼黑神藏不露聲音  
亮惟腹大如箕不能反側脉之兩手皆滑大尺猶有  
力曰此病初時食在上膈法當用吐素問云在上者  
因而越之是也乃誤下傷脾失其健運是以愈下愈  
脹又以峻利益下之致展轉增劇今先用六君子湯  
以醒其脾木香砂仁助其運動再用吐法吐出前藥  
弗慮大便不行獨慮行之不止耳計所服藥硝黃五  
斤巴豆白餅五兩又加諸標悍之劑幸而藥性未行

否則如瓶水底脫傾瀉無餘矣今傷在上中二焦下  
元未損故兩尺尚有神色蒼氣固根本未動尚可為  
也服藥後腹中大痛知藥力已至改用人參蘆防風  
蘆升麻桔梗各三錢煎服少頃用鷲翎探之涌出前  
藥約十餘碗病者曰目前光矣時已刻謂鷲翎探之  
涌出宜備人參數斤以待至午刻進至寶丹一帖以  
溫中氣未申間腹中濁氣下注覺少寬至晚大便秘  
一次小水畧通即用參朮各五錢炮薑三錢茯苓二

錢木香甘草各五分陳皮一錢煎服四鼓又行一次  
小水亦行次日連瀉十餘次以理中為丸與煎劑兼  
服脹全消食漸進凡瀉七十二日服參二斤

吳九宜每早晨腹痛泄瀉者半年糞色青腹膨脹咸謂  
脾腎瀉為灸關元三十壯服補脾腎之藥皆不効自  
亦知醫謂尺寸俱無脉惟兩關沉滑大以為憂疑久  
瀉六脉皆絕也孫診之曰無恐此中焦食積痰瀉也  
積膠於中故尺寸隱伏不見法當下反用補誤矣以

丹溪保和丸二錢加備急丸三粒五服之更下稠積  
半桶脹痛隨愈次日六脉齊見再以東垣木香化滯  
湯調理而安

汪氏婦腹大如箕堅如石時或作痛雜治月餘轉脹急  
小水不通或用溫補下元之劑則脹急欲裂自經求  
盡脉之兩關洪滑鼓指按之不下乃有餘之候也症  
雖重可生其致病之由母家常令女奴袖熟雞牛舌  
之類私授之因數食冷物積冷物積成脹滿悞作虛

治宜增劇也乃用積塊丸三下之而脹消積去以保和丸調理一月而愈

黃履素曰予在臨江時候服厚朴傷中氣之後偶食犬肉一塊遂覺停滯時中氣正虛不敢加山查等藥考本草食犬肉不消煮蘆根汁飲之可消如法煎飲覺右脇下微痛次日大痛殊不可解自是日甚一日坐卧皆妨反側痛如刀右脇下按之有物如雞子方書言右脇痛屬食積痰積有謂須攻治者有謂不宜攻

必須助正以消邪者時有醫主攻治謂不治將成痞塊子以為不然確守助正之說當痛極時不敢服藥靜以守之俟痛小定氣雖痞即用六君子加木香等行氣之藥以漸調之竟得痊可若悞信攻伐不知死所矣

張景岳治一上舍年及三旬因午刻食水煮麵角將至初更食及小腹下至右角間遂停積不行而堅突如拳大如鵝卵其痛之劇莫可名狀察其明係麵積顯

而無疑然計其已入大腸此正通則不痛之症也乃  
與木香檳榔丸其痛如故因疑藥力之緩猶未及病  
及更投神授丸以瀉之又不妨因謂此藥性皆寒故  
滯而不行也再投備急丸雖連得大瀉而堅痛毫不  
為減斯時也張計窮矣因潛思其由不過因麴豈無  
所以制之今既逐之不及使非借氣以行之不可也  
且計麴毒非大蒜不殺氣滯非木香不行又其滯深  
道遠非精銳之嚮導不能達乃用火酒磨木香令其



嚼生蒜一大瓣而以香酒送之一服後覺痛稍減三四服後痛漸止而食漸進而小腹之塊仍在後至半年許始得消盡由是知欲消食滯即大黃已豆猶有所不能及而推宜行氣為先也且知飲食下行之道乃必由小腹下右角間而後出於廣腸此自古無言及者

琇按就此觀之景岳平生臨症遺憾多矣夫麴角由胃入腸已至少腹之角豈能作痛如是而又如

拳如卵耶必其人素有疝病偶因麵食之濕熱發之或兼當日之房勞遂乃決張如是故推蕩之亦不應得木香火酒一派辛熱香竄而痛止耳至謂食由小腹下右角而後出廣腸謂自古無言及者更堪捧腹經謂大小腸皆盤屈十六曲則左旋右轉可知豈如筒如袋而直下乎嘻

張路玉治葉某停食感冒兩寸關俱濇數糗糊兩尺皆沉弦按之益堅雖其人尚能行走而脉少冲和此必

向有陳氣在少腹詢之果患寒疝數年因婉辭不用藥是夜腹暴滿而逝或問此人小恙何以知其必死曰凡人胃滿則腸虛腸滿則胃虛更實更虛其氣乃居今胸有痼而腹有積上下俱困能保其不交攻為患乎當知厥痛入腹脚氣冲心等疾皆是陰邪搏結鬱既久則挾陰火之勢而上升若胸中元氣有權則邪下伏今既為宿食填塞逆則上下俱滿正氣無容身之地往往有暴絕之虞所以不使用藥實未知其

即死也

傷寒論病人素有痞積及病傳入三陰則死謂之臟結蓋新邪與舊邪合併也

幼科汪五符夏月傷食嘔吐發熱顱脹自利黃水遍體肌肉捫之如刺六脉模糊指下似有如無足脛不溫自認陰寒服五積散一劑熱愈熾昏卧不省第三日利不止時讖語至夜尤甚或以為傷暑與香薷飲遂頭面汗出如蒸喘促不寧足冷下逆或以為大寒而脉息模糊按之殊不可得以為陽脫之候欲猛進參附或以為陰症斷無汗出如蒸之理脉所虛而症大

熱當用人參白虎爭持未決張診之曰六脈如此而心下按之大痛舌上灰刺如芒乃食填中宮不能鼓運其脈往往多此當與涼膈散下之一劑神思頓清脈亦頓起倘投參附其寧免乎

癸卯元夕周徐二子過石頑齋頭縱飲次日皆病酒不能起欲得葛花湯解醒張曰此湯雖為傷酒耑劑然人稟各有不同周子縱飲則面熱多渴此酒氣行陽明肌肉之分多渴知熱傷胃氣豈可重令開瀉以耗津

液與四君子湯去甘草加藿香木香煨葛根澤瀉下  
咽即愈徐子久患精滑飲則面色愈青此素常肝膽  
用事腎氣亦傷酒氣皆行筋骨所以不上潮於面葛  
花胃藥用之何益與五苓散加入參倍肉桂服後食  
頃漉便如皁角汁而安

柴嶼青治中翰陳雲山壯熱神昏為時醫所誤者累日  
勢甚危篤診得人迎脉緩自無外感惟氣口洪實舌  
胎甚厚重按其胸皺眉呼痛此胸中停食屢進發表

相去逕庭無怪參增劇也用小承氣湯連下二次即  
神清熱退而安

張飛疇治謝元海夏月常飲火酒致善食易饑半月後  
腹漸脹滿大便艱濇食亦日減醫用刻削清火俱不  
効左脉細數右脉澁滯此始為火助胃弦而善食繼  
為火灼胃液而艱運艱運則食滯食滯而脹滿脹滿  
則食減今宜斷食辛熱垂元氣未漓祛其滯而回其  
液日久則費調理也用枳實蘗滯湯去黃連白朮加

葛根一服大便通利而滯行又用健脾理氣三日後  
以小劑生脉加歲莖煨葛根半月而愈

張三錫治一人發熱頭痛七日不止診之左脉平和右  
寸關俱弦急有力乃內傷宿食為患也以二陳加枳  
實厚朴查麴柴胡三劑再加黃芩頭痛除但熱不淨  
投枳實導滯丸百粒更衣而愈

一婦每夜分即發熱天明暫止自投四物湯反加嘔惡  
診得左關微急而右寸關弦數有力詢之經後食梨



午後遂熱起正丹溪所謂胃虛過食冷物抑遏陽氣  
於脾土之中此病皆因血虛而得者遂以升陽散火  
湯一服熱已後用四物去地黃加枳朮陳皮健脾養  
血調理而愈

張三錫曰余初識繆仲淳時見袖中出彈丸咀嚼問之  
曰此得之祕傳饑者服之即飽飽者食之即饑因疏  
其方名資生丸余大喜之而頗不信其消食之功已  
於醉飽後頓服二九徑投枕卧夙興了無停滯始信

此方之神也

許學云有人全不思食補脾罔効授二神丹服之頓能  
進此即補母法黃魯直用兔絲子淘淨酒浸日挑數  
匙以酒下之十日外飲啗如湯沃雪亦此理也

治法  
彙

張三錫治一人夏食羊肉太多作渴燥煩自謂受暑用  
凉水調一元散躁渴愈甚診之脉雖滑不鼓隨以鹽  
湯吐之得生肉碗許乃以二陳加草果肉桂厚朴山  
查調理而安若用涼藥作暑治立見其斃

一人飲茶過度且多憤懣腹中常漉漉有聲秋來寒熱  
似瘧以十棗湯料黑豆煮曬乾研末棗肉和九芥子  
大以棗湯下之初服五分不動又服五分無何腹痛  
甚以大棗湯飲大便五六行時蓋日晡也夜半乃大  
下數斗積水而積平當其下時瞑眩特甚手足厥冷  
絕而復甦舉家號泣咸咎藥峻嗟乎藥可輕哉

一人過食瓜果時值夏月大瀉不止中脘大痛煩渴引  
飲自服天水散及香薷飲脉之右關寸俱沈伏因作

停冷治香砂六君子湯加炮薑厚朴一服痛渴俱止  
只以胃苓調理而安

龔子才治徐通府因好燒酒及五香藥酒過度患吐血  
唾痰六脉急數此酒毒積熱入於骨髓不受滋補以  
黃連解毒湯加知母貝母石膏連翹元參花粉葛根  
瓜蒌桔梗酒蒸大黃早晚服至百日外以六味丸加  
解毒湯在內與前湯藥並進又百日始瘳後歸田逾  
年仍為酒困而卒

陸肖愚治吳武祖之母少寡長齋稟賦極薄因正啖糯  
米粉食人誤報武祖不入泮不覺驚而且悶遂成內  
傷或與消導過多而中滿更甚脉之兩手斷續不勻  
洞瀉口開頭汗如洗元氣將脫胸中仍不可按脉不  
足而症有餘宜先補後攻急用附子理中湯二劑汗  
止瀉減脉稍有根以枳實理中湯進之其積漸覺移  
動脉亦有神後以潤字丸每服五分以煎劑送之積  
去身和調理而愈

徐小園子新昏多痰脾已受傷又外感遂往來寒熱項  
強背痛頭疼表裡具在或謂瘧疾遽用截藥因而口  
渴多食生冷變為吐瀉與柴苓湯不效診之四肢厥  
逆不省人事面色青黃乃用參附理子加枳實厚朴  
山查等三劑脉起而內傷之症纔現身大熱舌焦芒  
刺臍上下手不可按四肢澌然汗出下症悉具第用  
枳朴熟黃少許加鍤鏞水蘖之去燥屎三四塊勢未  
減又與枳朴查連小柴胡加人參少許間四五日進

潤字九五分大便去一次如是八十餘日裡症去六  
脉有神尚晡時潮熱胃氣不開口乾腹滿前方去參  
四劑勢又大減或謂傷寒三七不解謂之壞症經云  
安穀者昌絕穀者亡今將百日粒食不進焉有生理  
況身不熱舌無胎縱晡時微熱亦是陰虛之故急宜  
滋陰養血開胃健脾自愈遂服藥一劑又強飲粥湯  
半盞及龍眼湯一杯是夜仍身體大熱心口作痛異  
常煩躁舌上有胎再診右關尺沉實仍用枳實黃連

卷舒麥芽查朴送潤字九一錢五分去後極暢諸症  
頓除改用六君方知饑飽計百三十餘日頭髮落盡  
年餘未得出門戶

參附理中  
烏得舍罪

琇按如此治病時醫之說信哉

陳孟昭新正赴館偶開別室見一樞心中怦然是晚夢  
遺次日勉強行文薄暮啖肉麵遂頭疼身熱右脇有  
塊如碗疼痛寒熱疑為腫毒診之謂內傷兼感不信  
瘍醫視之外用敷藥內服解毒之劑不效或與投補



遂昏冒煩躁譫語如狂再延診脉洪數無倫此誤補  
故也仍作內傷飲食治之用青皮陳皮枳實厚朴山  
查黃連等又以麩皮炒熨稍甦再用潤字九五分數  
服宿垢去而痛減改用參朮歸芍麥冬陳皮茯苓甘  
草之類調理月餘而安

沈振宇病愈未幾因食饅頭羊肉等物遂胸腹脹滿否  
塞不通服藥旬餘不效口渴煩躁晡時更甚大便閉  
結凡硝黃枳朴檳查麻仁青皮紅花歸地芩連遍服

而大便不通陸曰大病須以大方治之若拘拘一二錢力量輕薄安能奏捷如玄明粉檳榔必用五錢枳實生地當歸黃芩必用一兩紅花必用三錢另以山查四五兩煎湯代水煎藥臨服必加鍤鏽水半酒杯其垢自行矣如言一劑果腹中運動響聲不絕兩時許下宿垢半桶頓覺爽利調理而痊

昔有婆羅門僧東來見食麵者云此大熱何以食之又見食中有蘆菰云賴有此以解其性自此相傳食麥

麵必啖蘆菔又小說云人有中麥麵毒者夢紅裳娘

子悲歌有一丸蘆菔火吾宮之句

醫說續編本草

扁鵲云酒飲過腐腸爛胃潰髓蒸筋傷神損壽有客訪

周顗頻出美酒二石顗飲石二客飲八斗次明顗無所苦酒量慣也客已死矣觀之客脇穿腸出豈非量

過而犯扁鵲之戒與

全上

王海藏治秦生好服天生茶及冷物積而痼寒脉非沈非浮上下內外舉按極有力堅而不柔觸指突出膚

表往來不可以至數名縱橫不可以巨細狀此陰證  
鼓擊脉也一身游行之火萃於胸中寒氣逼之搏大  
有力與真武四逆理中等湯九佐以白芍茴香酒糊  
丸使不僭上每百丸晝夜相接八九服凡至半斤作  
汗而愈亦世罕有也

陰症畧例  
醫說續編

薛立齋治一人食粽煩悶熱渴大便欲去用消導藥不  
應以白酒麴炒為末溫酒調服二錢俄頃腹鳴粽下  
而安一人食水晶園子過多肚服脹痛亦治以此方

而愈

一人食魚鮓腹痛患痢諸藥不效用陳皮白朮等分為末陳米湯下數服而愈一人每食蟹即腹痛用紫蘇濃煎湯一服而安

一婦人停食飽悶或用人參養胃湯木香檳榔丸而泄瀉吐痰腹中成塊又與二陳黃連厚朴反加腹脹不食此胃氣虛不能消磨用補中益氣加茯苓半夏五十餘劑脾胃健而諸症痊

實材治一人因暑月食冷物以致胸腹脹悶欲死服金液丹百丸少頃加金真丹百丸即有氣下降而愈

一人每飯後飲酒傷其肺氣致胸膈作脹氣促欲死服鍾乳粉五膈散而愈若重者灸中府穴亦好服涼藥則成中滿難治矣

一小兒食生杏致傷脾脹悶欲死灸左命關二十壯而愈又服金真丹五十丸

一人嗜茶成癖一方士令以新鞋盛茶令滿任意食盡

再盛一鞋如此三度自不喫也男用女鞋女用男鞋

用之果愈

集酒方

立齋治一男夏月入房食水果腹痛用附子理中湯而愈有同患此者不信別用芩連二陳之類而死

即上舍徐民則

林觀子治一人房慾後遠涉饑渴飲新汲泉水而歸病作醫以解表消中藥與之遂冷逾膝肘外熱躁擾不定掀衣擲被謾語無倫脉寸如蛛絲餘無急以人參薑附入葱白生薑大劑浸冷灌之得睡躁定去葱白

生薑服數帖得汗脉亦漸服加別藥調理而安

朱丹溪治一丈夫因酒多下血肚疼後重成痢滑石半兩連翹黃芩木通白芍枳殼白朮各二錢甘草五分桃仁二十一枚分四帖服

有人因憂愁中傷食結積在腸胃欲發吐利自冬後至暑月積傷發暴下數日不止王孟玉云下痢至隔年月日應期而發者此為有積宜下之止用溫脾湯尤佳如難下可佐以乾薑丸

乾薑巴豆  
大黃人參

各等分後服白朮



散

白朮 木香  
附子 人參

各等分右細末每二錢水一盞薑三片

棗一個煎六分溫服

一丈夫酒多病泄久不愈又自進附椒等食不進洩愈  
多滑石黃芩各半兩乾薑黃連雲皮粥為丸每服百  
丸

許學士治宗室趙彥材下血面如蠟不進食蓋酒病也  
授紫金丹方服之終刺血止面鮮潤食亦倍常新安  
一士人亦是與三百粒作一服立愈膽礬三錢黃

蠟二兩大棗五十枚右以砂鍋或銀石器內用好醋三升先下礬棗慢火熬半日取出棗去皮核次下蠟再慢火熬一二時如膏好入蠟茶二兩同和丸如桐子大每服二三十九茶酒任下

孫兆治館職學士張居易嗜酒散誕不為名利拘束忽發熱頭疼俾翰林醫官治之十日愈甚諸學士共議召孫孫至脉之曰餘人皆曰傷寒故作此痰也張學士好酒多痰食所傷也今痰非傷寒而右手脉甚數

左手脉平和此必傷酒食而作頭痛宜喫食藥五七  
丸俟之半日進退決矣孫遂用食藥經食久膈漸寬  
頭痛遂減再進利膈藥遂獲安大凡陽邪頭疼經十  
日豈得不變發熱而狂亂故知非傷寒乃食病之過  
也

朱丹溪治胡孺人因喫冷粉與肉頭痛自汗膈痞小便  
赤用白朮二錢半陳皮一錢半木通川芎黃芩各半  
錢薑水煎熟吞下草豆蔻丸阿魏丸保和丸各五十

粒

羅謙甫曰丁巳冬予從軍回至汴梁有伶人李人愛謂予曰大兒自今歲七月間因勞役渴飲涼茶及食冷飯覺心下痞醫投藥一服下利兩行症遂減不數日又傷冷物心腹復痞滿嘔吐惡心飲食無味且不飲食四肢困倦懶於言語復請前醫診視曰此病易為更利幾行即快矣遂以無憂散對加牽牛末白湯服至夕腹中雷鳴而作陣痛少馬既吐又瀉煩渴不止

飲食無度不復能禁時發昏憤再命前醫視之診其  
脉不能措手而退頃之冷汗如洗口鼻氣漸冷而卒  
矣小人悔恨無及敢以為問予曰未嘗親見不知所  
以然既去或曰予親見之果藥之罪歟而非歟予曰  
此非藥之罪乃失其約量之過也夫藥之無據反為  
氣賊內經云約方猶約囊也囊滿勿約則輸泄方成  
弗約則神氣弗俱故仲景以桂枝治外傷風邪則曰  
若一服汗出病瘥停後服不必盡劑大承氣湯下大

實大滿則曰得更衣止後服不必盡劑其慎如此此  
為大戒蓋得聖人約囊之旨也治病必求其本蓋李  
人以雜劇為戲勞神損氣而其中痛因時暑熱渴飲  
涼茶脾胃氣弱不能運化而作痞滿以藥下之是重  
困也加以不慎又損其陽虛而復傷傷而復下陰爭  
於內陽擾於外魄汗未藏四逆內起仲景所謂一逆  
尚引日再逆促命期如是則非失約量之過而何故  
內經戒云上工平氣中工亂脉下工絕氣不可不慎也

張子和治一細侶好茶成癖積在左脇曰此與肥氣頗  
同然痰瘥不作便非肥氣雖病十年不勞一日況兩  
手沈細有積故然吾治無針灸之苦但小惱一餉可  
享壽盡期先以茶調散吐出宿茶水數升再以木如  
意搯之又涌數升皆作茶色次以三花神祐丸九十  
餘粒是夜瀉二十餘行膿水相兼燥糞瘀血襍然而  
下明日以除濕之劑使服十餘日諸苦悉蠲神色清

瑩

抄自醫  
說續編

浙東監憲全公每晨先飲阿刺吉十餘杯然後飲常酒  
至六月大發熱張奕之治用冰攤心腹上冰消復增  
內飲以藥三日乃愈

一富家子二十餘歲四月間病發熱求趙以德治之脉  
浮沉無力而虛熱又往來潮熱作無時脉間有力又  
洪數隨熱進退因知非外感之熱必是飲酒晉毒在  
內今因房勞氣血之虛而病作問之果在正月間每  
晨飲阿刺吉喫狗肉一月既得其情遂用補氣血藥



加葛根以散酒毒一帖微汗反解急熱如故因知是  
氣血皆虛不禁葛根之散而然也必得鷄距則方可  
解其毒偶得乾者少許加於藥中其熱即愈

藥要或問全上

唐生者病因飲酪水及食生物下利紫黑血十餘行脾  
胃受寒濕毒與六神平胃散半兩加白朮三錢以利  
腰臍間血一服而愈

周子固治王經歷患身輕飄飄若行空虛中易醫凡七  
十人皆以為風虛與熱劑轉加周曰此酒毒也即以

寒涼之劑驅之隨愈

九靈山房集

張子和一酒病人頭痛身熱惡寒狀類傷寒診其脉兩手俱洪大三兩日不圖以防風通聖散約一兩水一中碗生薑二十餘片蔥二十莖豆豉一大撮同煎三沸去粗稍熱分作二服先服一服多半須臾以釵股探引咽中吐出宿酒香味尚然約一兩掬頭上汗出如洗次服少半立愈內經曰火鬱發之發謂汗之令其疎散也

朱丹溪治一飲酒入胸大滿發熱夜譫語類傷寒右脉  
不如左大與補中益氣湯去黃耆柴胡升麻加半夏  
以黃耆補氣柴胡升麻又升故去之服後病愈因食  
涼物心痛於前藥中加草豆蔻數粒愈

治法

立齋治曹銓因飲法酒肚門腫痛便秘脉實服荊防敗  
毒散不應用黃連內疎湯而愈

張子和治蘇郡丞秦水心初有中氣虛寒之症兼以案  
牘叢脞應酬紛擾遂致疲倦食少肌表微熱不能治

事召診始而用溫繼而用補其後每劑加參至兩許  
附至三錢然後飲食大進精神煥發復因湯液久而  
苦口則更製九劑常服大抵不外扶陽抑陰之義忽  
一日諸症復發視前較甚加之自汗頭暈嬾於語言  
亟延診首訊昔日大劑溫補煎方蓋謂九劑緩而無  
濟也診畢曰証即前日之症藥非前日之藥是殆勞  
神動怒之後復為飲食所傷致令當納受者不納受  
當運化者不運化實熱滯於太陰陽明兩經此王安

道所謂飲食勞倦之中仍有有餘不足今非昔此參  
附斷斷不可沾唇者惟宜清導消熱耳詢之果然遂  
如法治之而愈所以知秦之病者其脉左關獨大而  
氣口緊盛倍常左關獨大者肝主勞與怒也氣口緊  
盛非食而何藉若膠柱前方實之答其何能免

顧開一內人以傷食飽悶求治診其脉氣口初非緊盛  
而反得虛微察其症雖若胸次有物而神氣殊短正  
符東垣飲食勞倦之說宜補正以祛邪即用六君子

健脾佐以薑桂等味助中焦熟腐水穀一二劑後腹  
脹寬舒忽又以脾瀉告沈曰服補得瀉此元氣勝而  
滯氣消君子進而小人退之機也改用補中益氣數  
劑脾瀉即止飲食如常

聶久吾曰一侍婢停食腹痛先用消導藥畧加發散一  
劑其痛未減因用炒鹽湯服二碗吐之其痛減半又  
用發散為主加消導一劑其痛立止因悟寒邪停食  
作痛散其寒氣則食自消而痛自止自後依此施治

無不神效

消

張子和曰初虞世言凡渴疾未發瘡瘍使用大黃寒藥  
利其勢使大困大虛自勝如發瘡瘍膿血流漓而殮  
此真俗言也故巴郡太守奏三黃丸能治消渴余嘗  
以隔數年不愈者減去朴硝加黃連一斤作兩劑以  
長流千里水煎五七沸放冷日呷之數百次以桂苓  
甘露散白虎湯生藕節汁淡竹瀝生地黃汁相間服

之大作劑料以代飲水不日而痊故消渴一症調之  
而不下則小潤小濡固不能殺炎上之勢下之而不  
調亦旋飲旋消終不能沃鬲膜之乾下之調之而不  
減滋味不戒嗜慾不節喜怒病已而復作能從此三  
者消渴亦不足憂矣

昔有消渴者日飲數斗劉完素以生薑自然汁一盆置  
之密室中具罌杓於其間使其人入室從而鑊其門  
病人渴甚不得已而飲減盡渴減得內經年以潤之



之旨又內經治渴以蘭除其陳氣亦辛平之劑也劉  
完素之湯劑雖用此一味亦必有傍藥助之也

秦運副云有人消渴引飲無度或令食韭苗其渴遂止

法要日喫三五兩或炒或作羹無入鹽極効但喫得

十斤即佳過明日勿喫食醬無效

本草

苦楝根新白皮一握切焙入麝少許水二碗煎至一碗  
空心飲之雖困頓不妨自後下蟲三四條狀如蛇蟲  
其色真紅而渴頓止乃知消渴一症有蟲耗其津液

者醫說

續編

渴

鄂渚辛祐之患消渴九年服藥止而復作蘇樸教以白  
芍甘草等分為末每用一錢水煎服七日頓愈古人  
處方殆不可曉不可以平易而忽之也

經驗方陳日  
諸家本草

朱丹溪治徐兄年四十歲口乾小便數春未得之夏來  
求治診其兩手左澁右畧數而不強重取似大而稍  
有力左稍沈畧弱而不弦然濡却多於右喜兩尺皆

不甚起此由飲食味厚生熱謂之痰熱禁其厚味宜  
降火以清金抑肝以補脾用三消丸十粒左金阿魏  
丸各五粒以薑湯吞下一日六次又以四物湯加參  
朮陳皮生甘草五味麥冬煎服一日三次與丸藥間  
服一二日自覺清快小便減三之二口亦不乾止渴  
未除頭暈眼花坐則腰疼遂以摩腰膏治腰疼仍以  
四物湯用參耆減川芎加牛膝五味炒柏麥冬煎飲  
調六一散服及覺便多遂去六一散令仍服丸藥而

安

薛立齋治一貴人病疽疾未安而渴作一日飲水數升  
教服加減八味丸方諸醫大笑云此藥能止渴我輩  
當不復業醫矣皆用木瓜紫蘇烏梅人參茯苓百藥  
煎等生津液之藥止之數劑而渴愈甚不得已用前  
方服三劑渴止因相信久服不特渴疾不作氣血亦  
壯飲食加倍強健過於少壯之年薛氏家藏丹方屢  
用有驗

實材治一人頻飲水而渴不止曰君病是消渴也乃脾肺氣虛非內熱也其人曰前服涼藥六劑熱雖退而渴不止覺胸脇氣痞而喘實曰前症止傷脾肺因涼藥復損元氣故不能健運而水停心下也急灸關元氣海各三百壯服四神丹六十日津液復生方書皆作三焦猛熱下以涼藥殺人甚於刀劒慎之

楊賁亨鄱陽人博羣書精脉理每心計造方有患饑者諸醫以火症治亨久思之未得頃見堂上木橈自仆

乃為濕氣所蒸致朽忽悟水能消物不獨屬火此濕消耳遂投熱劑而愈

江西通志

孫文垣治一書辦年過五十沉緬酒色忽患下消之症一日夜小便二十餘度清白而長味且甜少頃凝結如脂色有油光治半年無效腰膝以下軟弱載身不起飲食減半神色大瘁脉之六部而無力經云脉至而促按之不鼓諸陽皆然法當溫補下焦以熟地黃六兩為君鹿角霜山茱萸肉各四兩桑螵蛸鹿角膠

人參白茯苓枸杞子遠志鬼絲山藥各三兩為臣益  
智仁一兩為佐大附子桂心各七錢為使煉蜜為丸  
梧桐子大每早晚淡鹽湯送下七八十丸不終劑而  
愈或曰凡消者皆熱症也今以溫補成功何故曰病  
由下元不足無氣升騰於上故渴而多飲以飲多小  
便亦多也今大補下元使陽氣充盛熏蒸於上口自  
不乾譬之釜釜有水必釜底有火釜潤而不乾  
也

一人消中日夜溺七八升鹿角燒令焦為末以酒調服  
五分日三服漸加至方寸匕

一人不時發熱日飲冰水數碗寒藥二劑熱湯益甚形  
體日瘦尺脉洪大而數時或無力王太僕曰熱之不  
熱責其無火又云倏熱往來是無火也時作時止是  
無水也法當補腎用加減八味丸不月而愈

張路玉治趙雪訪消中善食日進膏粱數次不能敵其  
飢勢丙夜必進二餐食過即昏昏嗜卧或時作酸作



甜或時夢交精泄或時經日不飲或時引飲不輟自言省試勞心所致前所服皆安神補心滋陰清火之劑不應察其聲音濁而多滯其多滯其形雖肥盛色蒼而肌肉綿軟其脉六部皆洪滑而數惟關特甚兩尺亦洪滑而按之少神此腎氣不充痰濕挾陰火泛溢於中之象遂與加味導痰加蘭香數服其勢大減次以六君子合左金枳實湯泛丸服後以六味丸去地黃加鰾膠蒺藜平調兩月而愈

朔客白小樓中消善食脾約便難察其形瘦而質堅診其脉數而有力時喜飲冷氣酒此酒之濕熱內蘊為患遂以調胃承氣三下破其蘊熱次與滋腎丸數服滌其餘火遂全安

粵客李之藩上消引飲時當三伏觸熱到吳初時自汗發熱煩渴引飲漸至溲便頻數飲即氣喘飲過即渴脉之右寸浮數動滑知為熱傷肺氣之候因以小劑白虎加人參三服勢頓減次與生脉散調理數日而

瘥

薛廉夫子強中下消飲一溲二因新娶繼室真陰灼爍  
虛陽用事陽強不倒恣肆益甚乃至氣息不續精滑  
不收背曲肩隨腰胯疼軟足膝痿弱寸步艱難糜粥  
到口即厭惟喜膏粱方物其脉或數大少力或弦細  
數疾此陰陽離決中空不能主持而隨虛火輒內輒  
外也與八味腎氣保元獨參調補經年更與六味地  
黃久服而瘥

邵某仲夏與婢通因客至驚恐精氣大脫即凜凜畏寒  
翕翕發熱畏食畏飲小便淋瀝不禁診之六脉弦細  
如絲青青如循刀及此腎中真陽大虧之候令服生  
料六味加桂附以通陽氣咸謂夏暑不宜桂附另延  
醫峻用人參附子月餘飲食大進猶謂參附得力恣  
餌不徹遂至日食豚蹄鷄鴨七八餐至夜預治熟食  
飽啖二次如兩月餘形體豐滿倍常但苦時時嘈雜  
易饑常見青衣羣鬼圍繞其側再邀診其脉滑數有

力而右倍於左察其形色多滯且多言多笑而語無倫次此味痰壅塞於中復加辛熱助其淫火始本陰虛未傳消中之患也不急祛滌必為狂癡之患為製涌吐之劑遲疑不進未幾忽大叫發狂妄見始信言之非謬也

許學士云一卒病渴日飲水斗許不食者三月心中煩悶時已十月予謂心經有伏熱與火府丹數服越二日來謝云當日三服渴止又三服飲食如故此本治

淋用以治渴可謂通變也生地木通苦苓

見婦人良方

陸祖愚治李悅吾年五十餘患消渴症茶飲不能輟口小便多而數殊不欲食及食後即饑病將一載精神困怠肌膚枯澁自分必死脉之沉濡而濇曰病尚可藥凡人身之津液以火而燥然必以氣化而生前醫純用清涼滋潤之品所以不効潔古云能食而渴者錢白虎倍加人參大作湯劑多服之不能食而渴者錢氏白朮散倍加乾葛亦大作劑服之今不能食反食

即饑當合二方加升麻佐葛根以升清陽之氣少用桂附以合從治之法每味數兩大砂鍋濃汁禁湯飲以此代之此病仲景謂春夏劇秋冬差今當盛夏病雖不減亦不劇若依法治之兼絕厚味戒嗔怒閉關靜養秋冬自愈幸其能守戒忌交秋即瘥秋末全愈陸養愚治兩廣制府陳公年近古稀而多寵婢且嗜酒忽患口渴茶飲不輟而喜熱惡涼小便極多夜尤甚大便秘結必用蜜導日數次或一塊或一二塊下身

軟弱食減肌削所服不過生津液潤燥清涼而已脉之浮按數大而虛沈按更無力曰症當溫補不當清涼問消本熱症而用溫補何也曰經謂脉至而促按之不鼓諸陽皆然今脉數大無力正所謂促而不鼓無陽脉也以症論之口渴而喜熱飲便秘而熱偏多皆無陽症也曰將用理中參附乎曰某所欲溫補在下焦而非上中二焦也經曰陽者從陰而極起也又曰腎為生氣之原今恙由於腎水衰竭絕其生化之



原陽不生則陰不長津液無所兼以出故上渴而多  
飲下燥而不潤前無以約束而頻多下無以轉輸而  
艱秘食減肌削皆下元不足故也曰予未病時陽已  
痿病後從不近女色腎未必衰竭曰腎竭於未病之  
前痿是腎竭明驗既痿之後雖欲竭而無從矣彼雖  
不悅而心折其言遂委治之乃以八味丸料加益智  
仁煎人參膏糊丸每服五錢白湯送下日進三服數  
日溺少十日溺竟如常大便尚燥每日一次不用蜜

藥矣第口渴不減食尚無味以升麻一錢人參黃耆  
各二錢煎湯送丸藥數服口渴頓止食亦有味又十  
日諸症全安

薛立齋曰一男子作渴日飲水數碗冬月亦然彼用加  
減八味丸去肉桂服之不應一男子患此欲治以  
前丸彼謂肉桂性熱乃服知柏等藥渴不止背發疽  
而歿一男子亦患此症漸消瘦與前丸數服渴減  
半一劑而痊再劑形體復壯夫肉桂腎經藥也前症

乃腎經虛火炎上無制為患用肉桂導引諸藥以補之及引虛火歸原故效 一男子脚面發疽愈而作渴以前丸治之而愈 一富商稟賦頗厚素作渴日飲水數碗面發一毒用消毒藥潰而雖愈尺脉尚數渴亦不止時孟秋謂此火旺水涸之脉也須服加減八味丸以補腎水制心火庶免疽毒之患彼不信至夏果脚背發疽脉數按之則溢而無力足竟黑腐而死 一男子稟頗實乏嗣服附子等藥致作渴左足

大指患疽色紫不痛脉亦數而澁亦死大抵發背腦  
疽腫痛色赤水衰火旺之色尚可治若黑若紫火極  
似水之象也乃腎水已竭精氣固涸決不治外科精  
要云凡病疽疾之人多有既安之後忽發渴疾而不  
救者十有八九疽疾將安而渴疾已作宜服加減八  
味丸既安之後而渴疾未見宜先服之以防其未然  
薛兒時聞其父云一士夫病渴疾諸醫皆用渴藥累  
載不痊有一名醫教服加減八味丸不半載而愈

一老人冬月口舌生瘡作渴心脉大而實尺脉大而虛  
此下消症也患在腎須加減八味丸補之否則後發  
疽難療不信仍服三黃等藥降火次年夏果患疽而  
殂東垣曰膈消者以白虎加入參湯治之中消者善  
食而瘦自汗大便硬小便數脉訣云口乾饒飲水多  
食亦饑虛成消中者調胃承氣湯三黃丸治之下消  
者煩躁引飲耳輪焦乾小便如膏 又云焦煩水易  
易虧此腎消也六味地黄丸治之總錄所謂未傳能

食者必發腦疽背瘡不能食者必傳中滿鼓脹皆謂  
不治之症潔古老人分而治之能食而渴者白虎加  
人參湯不能食而渴者錢氏白朮散倍加葛根治之  
上中既平不復傳下消矣前人用藥厥有旨哉或曰  
末傳瘡疽者何也此火邪盛也其瘡痛甚而不潰或  
赤水者是也經云有形而不痛陽之類也急攻其陽  
無攻其陰治在下焦元氣得强者生失强者死

一婦人面患毒焮痛發熱作渴脉數按之則實以涼膈

散二劑少愈以消毒藥數劑而平

一男子肩患疽作渴脉數有力以黃連解毒湯三劑而止更以仙方活命飲四劑潰而愈

一男子潰而煩渴以聖愈湯二劑而寧以人參黃耆當歸地黃四劑渴止以八珍湯二十劑而愈大抵潰後有此症屬氣血不足須用參耆以補氣歸地以養血若用苦寒之劑必致有誤

一男子患毒作渴右關脉數以竹葉黃耆湯治之而愈

更以補中益氣湯加黃芩而痊

一男子潰後口乾遇勞益甚以補中益氣湯加五味麥

冬治之而愈更以黃耆六一湯而敏

耆六  
草一

繆仲淳治湖州庠友張時泰正月間驟發齒痛十餘日

而愈四月間焦勞過多齒痛大作醫用石膏知母等

藥不効用刀去齒間紫血滿口齒痛不可忍齒俱搖

動矣至六七月間飲食益多小便如注狀如膏肌肉

盡削至十一月身不能起冬末用黃耆地黃等藥稍



能起立然善食易饑如故小便如膏亦如故今年二  
三月愈甚亦不服藥齒痛如故當門二齒脫落復加  
口渴晝夜不止此中下二消症也為立方未數劑而  
麥冬蘆根各五兩五味黃連各三錢黃耆五錢生  
地六錢天冬一兩用繅絲湯十碗煎二碗不拘時服  
凡方於前藥中加黃柏三兩牛膝五兩沙參六兩枸  
杞四兩五味六兩蜜丸常服遂不復發

張景岳治省中周公山左人也年逾四旬因案牘積勞

致成羸疾神困食減時多恐懼自冬徂夏通夕不寐者半年有餘而上焦無渴不嗜湯水或有所飲則沃而不行然每夜必去溺二三升莫知其所來其半皆膏濁液尪羸至極自分必死診之脉猶帶緩肉亦未脫知其胃氣尚存慰以無慮乃用歸脾湯去木香及大補元氣煎之屬一以養陽一以養陰出入間用至三百餘劑計人參二十觔乃得全愈此神消於上精消於下之症也可見消有陰陽不得盡言為火

自來運抄入

喻嘉言曰友人病消渴後渴少正反加燥急足膝痿弱

予主是丸

白茯苓丸

加犀角有醫曰腎病而以黃連犀角

治心母乃倒乎予曰腎者胃之關也胃熱下傳于腎則關門大開心之陽火以直降於腎心火灼腎躁不能需子用犀角黃連對治其下降之陽光寧為倒乎服之果效再服六味地黃丸加犀角而肌澤病起矣

沈效兄  
抄本

胡天敬年五旬素豪飲而多思慮自弱冠後即善病近

則兩足及臂常時痺痛甚則肝腎之氣上逆或致暈厥汗出不寐齒痛齟露夜卧陽事暴舉時時夢遺面有油光楷去復爾脉之兩手俱豁大關前尤搏指據症脉乃二陽之病發心脾今已傳為風消矣詢其小便云頗清白今以器貯逾時觀之果變稠漿面結腐皮遂恐甚告以平昔洪飲縱欲勞神數十年來所服桂附純陽之藥不可勝計未知尚能愈否曰幸未至息責但能斷飲絕欲多服養榮之劑尚可為也今病

但有春夏而無秋冬非兼清肅之治不可乃與生熟地杞子麥冬沙參地骨知母黃柏黃連石膏出入增減十餘劑諸症漸平唯齒痛轉甚自製玉帶膏貼之而愈次年因診其媳產病告以前方出入常服計用石膏不下四五斤矣此則初為寒中後為熱中之變症也然初之桂附未為癰疽豈非天幸乎哉

黃疸

黃疸之病當以十八日為期治十日已上宜瘥反劇為難治

竇材治一人遍身皆黃小便赤色而瀉炙食竇穴五十

壯服薑附湯全真丹而愈

沈以潛葛可久俱神醫也一日有老嫗患黃疸詣沈求  
治曰吾固未之能薦於葛葛延沈飲以針針其左右  
乳下而與沈飲者頃刻時出啟左針而左半身肉色  
瑩然啟右針而右半身肉色如左

漱石  
關談

張子和治一男子作贅偶病疸善食而瘦四肢不舉面  
黃無力其婦翁欲棄之其女子不肯曰我已生二子  
矣更適他乎翁本農者召壻意欲作勞見其病甚每

日辱詬教之餌膽礬丸三稜丸了不關涉針灸祈禳  
百無一濟張見之不診而療使服涌劑去積痰宿水  
一斗又以瀉水丸通經散下四五十行不止命以冰  
水一盃飲之立止服平胃散等間服檳榔丸五七日  
黃退力生蓋脾疸之症濕熱與宿穀相搏故也俗謂  
之金勞黃

周黃劉三家各有僕病黃疸張曰僕役之職飲食寒熱  
風暑濕寒尋常觸冒恐難調攝虛費治功其二家留

僕於張所從其飲餌一僕不離主人熱役三人同服苦散以涌之又服三花神祐丸下之五日之間果二僕愈一僕不愈如其言

一女病黃遍身浮腫面如金色困乏無力不思飲餌惟喜食生物泥煤之屬先以苦劑蒸餅為丸涌痰一碗又以舟車丸通經散下五七行如墨汁更以導飲丸磨散氣數日肌肉如初

趙君玉病發遍身黃往問醫者醫云君乃陽明症公等



與麻知幾皆受訓於張戴人是商議吃大黃者難與  
論病君玉不悅歸自揣無別病乃取三花神祐丸八  
十粒服之不効乃悟曰予之濕熱盛矣此藥尚不能  
動以舟車丸瀆川散作劑大下一斗糞多結者一夕  
黃退君玉由此益信戴人之言

張仲文治一婦人年六十歲病振寒轉慄足太陽寒水  
也呵欠噴嚏足少陽膽也口亡津液足陽明不足也  
心下急痛而疽手少陰受寒足少陰血滯也身熱又

欲近火熱在皮膚寒在骨髓也臍下惡寒丹田有寒  
渾身黃及睛黃皆寒濕也餘症驗之知其為寒溺黃  
赤而黑又頻數乃寒濕勝也病來身重如山便著床  
枕者陰濕盛也其脉右手關尺命門弦細按之洪而  
弦弦急為寒加之細者北方寒水襍以緩甚者濕盛  
出黃色脉洪大者心火受制也左手又按之至骨舉  
手來實者壬癸腎旺也六脉按之但空虛者下焦無  
陽也用藥法先宜以輕劑去其寒濕兼退其洪大之

脉以理中加茯苓湯投之

朱丹溪治一婦人年二十八歲發黃脉澁經水自來不行身體倦怠未曾生子用陳皮白朮木通各一兩黃芩歸頭丹皮各半兩甘草一錢分作十二帖水煎食熱服

一人年二十歲因勞又冒雨得疸症脚痠心悸口苦力弱尿黃脉浮而數病在表宜解外黃耆三錢白朮蒼朮各一錢陳皮蘇葉木通各五分山梔炒二錢甘草

稍些白水煎服下保和十五丸與點抑青各十九溫  
中二十九而愈

一婦人年三十面黃脚瘦弱口苦喜茶月經不勻且多  
倦怠用黃耆甘草各三錢人參當歸白芍各一錢木  
通陳皮各五分白朮一分炒栢秦艽各二分

一婦年六十面黃倦甚足瘦口苦脉散而大此濕傷氣  
也白朮半兩陳皮四錢蒼朮木通黃芩各三錢人參  
川芎各二錢黃栢炒一錢甘草炙五分分六帖水煎

食前服

王官人痞後面黃脚痠弱倦怠食飽氣急頭旋黃耆甘草木通各二分白朮一錢半厚朴陳皮蒼朮各一錢黃柏炒三分水煎服

成庚五官面黃脚痠無力食不化脉虛而少弦口苦肚脹宜補之人參木通各三分白朮一錢五分當歸白芍川芎陳皮蒼朮各五分甘草二分水煎下保和丸  
四十九

孫文垣治一人因冒雨勞力汗出又以冷水澡浴因發熱口渴心與背脹痛小水長而赤舌胎黃不眠目如金皮膚盡黃或謂年高不敢與治診得左脉浮數

熱

右濡弱

濕

皆七至

濕熱相併

此濕熱發黃症也病雖重年

雖高猶可為以柴胡三錢

太重否

酒芩葛根青蒿香薷

花粉各一錢人參七分甘草五分連進二劑得微即

能次早熱退其半舌稍淡潤身黃未退胸膈餘熱作

煩以竹茹青蒿葛根各一錢人參麥冬花粉知母各

八分白芍六分二帖熱退食進精神陡長後與補中益氣湯加青蒿麥冬花粉十帖黃頓痊

一人患酒疸遍身皆尿如柏汁目如金汗出沾衣如染胸膈痞悶口不知味四肢疲軟脉濡而數以四苓散加厚朴陳皮山查麥芽葛根倍青蒿水煎臨服加萱草根自然汁一小杯四帖頓愈

一人病後身面俱黃吐血成盆

熱鬱陽明

諸藥不效用螺十

個水漂去泥搗爛露一夜五更取清服二三次血止

黃愈

小山怪症方  
本草綱目

外臺秘要治三十六黃急救方用雞子一顆連殼燒灰  
研酢一合和之溫服鼻中蟲出為効身體極黃者不  
過三枚神効

柴嶼青治覺羅諱瑪德夫人病疸醫投茵陳五苓散未  
効又合末藥服之肌膚白眼皆如金色轉致不思飲  
食右關緩弱特甚柴曰胃為水穀之海脾為倉廩之  
官府藏失職濕熱滋甚今惟有調其土能健運濕熱



自去不必治痘而痘自愈矣用六君子湯加厚朴炮

薑以溫中神麴麥芽以助戊己之化不數劑而全愈

東垣曰戊申春一婦人六十歲病振寒戰慄

太陽寒水客也

欠噴嚏

足少陽溢

口亡津液

足陽明不足也

心下急痛而痞

手足陰受

寒也故急痛足太陰血滯為痞

身熱近火

熱在皮膚寒在骨髓亦拒寒戰慄也

臍下惡

寒

丹田有寒也

渾身黃而白睛黃

寒濕也以餘症推之知具寒也

溺黃赤

而黑頻數

寒濕盛也

自病來身重如山便著牀枕

至陰濕盛也

其脉診得左右關并尺命門中得弦而急極細雜之

以洪而極緩

弦急為寒加之以細細者北方寒水雜以緩甚者濕勝出黃色也又洪大者心

大受制也

左骨按之至骨舉止來實者

壬癸俱旺也

六脉按之

俱空虛者

下焦無陽也

先以輕劑去其中焦寒濕兼退其

洪大脉理中湯加茯苓是也水煎冰之令寒服之謂

之熱因寒用假寒以對足太陽之假熱也以乾薑之

辛熱以瀉真寒也故曰真對真假對假若不愈當以

朮附湯冰之令寒以補下焦元氣也

試効方醫說續編

陸祖愚治潘巨源食量頗高恣肆大嚼因勞役失饑傷

飽每患脾胃之症或嘔或瀉恬不介意後成黃疸用茵陳五苓散治之而痊仍前飲食不節疸症復作人傳一方以苦藥葫蘆酒煮服之即效試之果然仍力疾生理後試之至再至三周身熏黃肚腹如鼓而卒薛立齋治大司徒李蒲汀南吏部少宰時患黃疸當用淡滲之劑公尚無嗣猶豫不決曰有是病而用是藥以茵陳五苓散加苓連山梔二劑而愈至辛卯得子應天王治中遍身發黃妄言如狂苦於胸痛手不可近

此中焦畜血為患用桃仁承氣湯一劑下瘀血而愈  
又太守朱陽山弟下部畜血發狂用抵當湯而愈

馬元儀治沈王格患疸症一身及面目悉黃微見黑滯  
煩渴腹滿脉之左弦數右空大此內傷發黃為厥陰  
肝木太陰脾土二藏交傷之候也夫肝鬱則生熱脾  
鬱則生濕濕熱交爭而煩渴腹滿發黃之症生矣至  
黑色兼見於面則并傷其腎汗之下之非其治也宜  
平肝之亢扶土之虛兼解鬱熱以清氣道除濕蒸而

和中氣用人參三錢白朮二錢白芍一錢黃連山梔  
七分歸身丹皮茵陳秦艽各一錢柴胡七分炙草五  
分半麴一錢服三十劑而痊

顧奉常務遠目黃脾氣弱仲淳疏方用茵陳三錢人參  
三錢薏苡仁三錢蓮肉三錢木通八分黃連酒炒一  
錢山梔炒八分白朮土炒一錢石斛酒蒸三錢皆治  
疸之劑以事冗未服既而身目皆黃小便亦赤乃服  
仲淳先見飲前藥稍愈一按摩者投以草汁藥酒脾

敗遂不起臨歿下瘀血數升亦畜血症也以其年邁

不絕慾故爾前方尚有茯苓二錢

廣筆記

施靈修乃兄七年前曾患疸症服草藥愈後復發坐多

氣多勞故草藥不效服田螺發脹一日夜大作寒熱

因發渴小便如油眼目黃且赤手足黃紫仲淳以瘀

血發黃服後藥大小便通黃及渴俱減橘紅一錢五

分紅麴炒研二錢山查五錢鬱金汁十五匙薏苡六

錢木瓜三錢牛膝五錢五分麥冬五錢車前二錢五

分赤苓三錢通草五分白芍酒炒四錢竹茹二錢河

水二鍾煎八分饑時服三日後加入參三錢

廣筆記

徐環薇年三十餘病疸服山梔茵陳五苓六一之劑將  
兩月不效脉之弦細而駛面目爪甲俱淡黃語言遲  
倦謂之曰君以黃疸求治此其餘症耳今病成勞損  
矣乃竦然曰誠有之近來夜卧不寧晚即發熱黎明  
始退咳嗽痰稀腰膝疼痛然治之當奈何曰病緣陰  
虛火盛肝熱久鬱移其所勝故食少便溏發為黃症

與酒穀諸疸為濕熱熏蒸者不同乃服苦寒滲利重傷其陰致成勞損今宜峻養肝腎俾嗽止熱退食進便調而黃自消矣與集靈膏加減十餘劑諸症漸瘳黃亦愈矣

金魯瞻年四十餘館於時醫湯靜公宅病疸諸治不效已歷數醫最後一人與草頭方四味中有六月雪餘忘之矣服之增劇脉之軟弱無神畧數外症目黃如橘面額則黃而黑黯腹大臍凸便溏食少動則氣促



知為脾腎兩虧近乎女勞一症乃疸中最難治者也  
與熟地山藥各一兩杞子棗仁苡仁各五錢彼疑太  
補待以問湯湯老醫也謂曰方極是第吾輩素不用  
此姑試之一劑減二劑又減再診脉漸起仍前方八  
劑全愈

朱天一年二十餘喜食糖及燥炙糕餅忽病黃面目如  
金脉之兩關數實有力尺滑大便六七日不行小便  
黃澁此敦阜太過燥熱所鬱如以素薏覆火其色必

黃非濕症也與小承氣湯加當歸白芍一劑便行而瘥

赤丹

又名風痺又名赤游風又名赤瘤

孫思邈曰貞觀七年三月予在內江縣飲多至夜覺四體骨肉疼痛至曉頭痛額角有丹如彈丸腫痛至午通腫目不能開經日幾斃予思本草芸苔治風遊丹腫遂取葉搗傳隨手即消其驗如神亦可搗汁服之

一云無葉用子研代之

張子和治黃氏小兒面赤腫兩目不開以排針刺輕砭  
之除兩目尖外亂刺數十針出血乃愈此法人多不  
肯從必欲治病不可不謹護

朱丹溪治一中年男子癰潰後發熱乾嘔背發丹熛用  
諸般敷貼丹熛藥乃用力於個個丹頭出血皆不退  
後半陳生薑加補劑治嘔不效遂純用參半兩歸朮  
各一錢五分濃煎一貼嘔止二三貼丹漸緩熱漸減  
約五十餘貼熱始除神氣始復

鮑允中年五十歲風丹痒甚腹微疼咽不利面身微腫  
五六日不退兩寸脉滑大實右浮大左浮弦小以炒  
芩炒連四物桔草黍粘紫葢各一錢防風黃耆各半  
錢凡五六帖而安

黃師文治一婦人苦風丹每酒沾唇則風丹重迭而起  
痒刺骨殆不可活令服五積散約數服以杯酒試之  
如其言飲酒已丹不作德昭一婢亦苦風丹亦以此  
聞其說遂服五積散亦瘥又師文用五積散治產瀉

有奇功

北憲  
灸輟

薛立齋治一婦人素清苦因鬱怒患遊風晡熱內熱自汗盜汗月經不行口乾咽燥此鬱氣傷脾乃以歸脾湯數劑諸症稍退後兼逍遙散五十餘劑而愈

一婦人患此性躁寒熱口苦脇痛耳鳴腹脹溺瀉乃肝脾血虛火旺也用六君加柴胡山梔龍膽數劑更與逍遙散兼服漸愈又與六味丸逍遙散七十餘劑諸症悉退

一婦人患前症誤服大麻風藥破而出水煩渴頭暈誠類風症六脉洪數心脾為甚曰風自火出此因怒火脾胃受邪血燥而作非真風症也與逍遙散六味丸以清肝火滋脾血生腎水而愈

一婦人患前症久不愈食少體倦此肝脾虧損陰虛發熱也先用補中益氣湯加川芎炒梔元氣漸復更以逍遙散而瘡漸愈

一婦人患赤遊風晡熱痒甚用清肝養血之劑不信乃

服大麻風藥臂痛筋攣又服化痰順氣之劑四肢痿弱又一婦患前症數用風藥煎湯泡洗以致腹脹並歿

一女子十五歲患瘰癧赤暈形氣倦怠此肝火血虛所致用加味逍遙散而赤暈愈用益氣湯六味地黃丸而瘰癧消

一婦人身如丹毒搔破膿水淋漓熱渴頭暈日晡益甚用加味逍遙散而愈

續名醫類案卷十二



欽定四庫全書

續名醫類案卷十三

錢塘魏之琇撰

癥瘕

附瘕癖

陳自明治毘陵一貴宦妻患小便不通臍腹脹痛不可  
忍衆醫皆作淋治如八正散之類俱不得通陳診之  
曰此血癥也非瞑眩藥不可去與桃仁煎更初服至  
日午大痛不可忍遂臥少頃下血塊如拳者數枚小

便如黑豆汁一二升痛止得愈此藥治病的切然猛烈太峻氣虛血弱者宜斟酌之桃仁大黃朴硝各一兩蜜蟲半兩炒黑共為末醋煉丸梧桐子大五更初

溫酒吞下五丸

原注此方不可妄用

良方

杜壬治尚書媳婦馬氏年三十二腹中血塊作疼經五六年形已骨立衆皆曰不可為奈其未死何家甚貧而大小慙之一日召杜至告杜曰但以濟物為懷則可業已請召明醫非所言也遂以少物帛贈杜杜不

受曰但服某藥必獲安無以是為疑遂示方用沒藥  
牛膝乾漆當歸各半兩硃砂木香水蛭炒紅娘子炒  
紅花丹皮硃砂各一分海馬一个斑猫去翅足炒十  
四个為末酒醋各半升熬為膏每日天明用一皂子  
大酒醋化下一月病退六十日漸安

陳藏器曰昔有患瘰癧者夢人教每日食大蒜三顆初  
食遂致瞑眩吐逆下部如火後有人教取數瓣合皮  
截却兩頭吞之名曰內灸果獲大效

本草綱目

張子和治汴梁曹大使女年既笄病血瘕數年太醫宜  
企賢以破血等藥治之不愈企賢曰除得陳州張戴  
人方愈一日戴人至汴京曹乃邀問焉戴人曰小腸  
遺熱于大腸為伏瘕故結硬如塊面黃不日乃用涌  
泄之法數年之疾不再旬而愈

柴嶼青乾隆己未寓瀋陽京兆署兵房吏王某患瘕疾  
教以蒸臍法治之兼服加減五積散而愈其妻毋同  
患是症王即方遺之亦痊

孫文垣治汪氏婦經水久不止內有紫黑血塊胃脘胸  
腹皆痛玉戶且腫手足皆冷不知飢餓腹下有一塊  
堅如石脉左數右沉澁此血瘀症也用糖毬子五錢  
元胡索五靈脂香附麥芽青皮各一錢水煎服痛減  
半手足漸溫加當歸丹參蒲黃益母川芎四帖痛止  
玉戶亦消又四帖而經水調

張子和治一童子入門狀如鞠躬而行張曰此瘕氣也  
令解衣揣之二道如臂其家求療先刺其左如刺重

紙剝然有聲而斷令按摩之立軟其右亦然觀者嗟異或問之曰石闕穴也

永康應童嬰腹疾恒病婁行久不伸松陽周漢卿解棠視之氣衝起腹間者二其大如臂漢卿刺其一魄然鳴又刺其亦如之稍按摩之氣血盡解平趨無留行

續文粹

武叔卿曰夫瘰癧癰疽血氣塊硬發歇刺痛甚則欲死究而言之皆血之所為

陳良甫常治一婦人血氣刺痛極不可忍甚而死一二日方省醫巫併治數年不愈僕以葱白散烏雞丸遂安

陳良甫治一婦人血氣作楚如一小盤樣走注刺痛要一人扶定方少止亦用此二藥而愈尋常小小血氣用此二藥亦有奇效

濟陰綱目

陳良甫陳宜人病血氣作楚痛不可忍服諸藥無效召診之兩關脉弱沈而肝脉沈差緊此血氣漸成瘕癖

也只以前二方治之而愈又四明馬朝奉後院亦病

此用二方治之亦愈

同上

宋孝武路太后病衆醫不識徐文伯診之曰此石博小

腸耳乃為水劑硝石湯病即愈

南史

董含妾腹内生一痞始如彈丸五六年後大類鵝卵中

似有一窟往來移動或痛或止百藥罔效久之遍體

發腫內作水聲日夕呻吟死而復甦者再諸醫束手

無策皆云此名水鼓病已成不可復痊矣章文學旭



字東生名醫也善治奇疾往邀之曰此非水症乃積聚所致不半日可愈但所用藥性猛利轉鬪而下驅水甚疾試問疾人願服與否病者曰我已垂殆苟一綫可救死無憾也於是取紅九十粒如菡豆大以檳榔枳實等五六味煎湯下之初覺喉中响聲可畏勢將不支頃之胸膈間如刀刃亂刺哀號轉擲痛不可狀又頃之下水斗許頭面腫退不逾時又下數升腹背腫退病人曰我今覺胸背頓寬遂熟睡片刻時章君

猶在坐也曰此番不獨水去痞亦當漸散矣留補劑  
二曰明後日可連服之遂辭去至晚又下水四五升  
手足腫全退不三日病全愈既而忽痞勢搖動下紅  
黑痢三晝夜痞亦不見衆醫驚服往叩其故章笑曰  
此名腸覃在內經水脹論中君輩自坐不讀書耳皆  
慙而退按岐伯曰寒氣客於腸外與胃氣相搏癖而  
內著瘕肉乃生始如雞卵至其成若懷子之狀按之  
則堅退之則移月事以時下腸覃生于腸外故也又

有一種名石瘕病狀相同月事不以時下石瘕生于

泡中故也皆婦人之疾因內有積聚可導而下似水

脹而非水脹也

臨症之工  
大宜分別

此疾若非章君久作泉下

之鬼矣

今人能感激如是者  
鮮矣 三國識畧

一男子腸鳴食少臍下有塊耕動若得下氣多乃已已

而復鳴屢用疎氣降火藥半年不愈乃以理中湯為

君佐苓連枳實一服腸鳴止又每服吞厚朴紅豆蔻

丸其氣耕亦平矣

薛立齋治一婦人月經不調兩脇腫脹小便澁滯腹中  
一塊作痛或上攻脇腹或下攻小腹發熱晡熱惡寒  
肌膚消瘦飲食無味殊類瘵症久而不愈此肝脾血  
氣虧損用八珍湯逍遙散歸脾湯隨症互服而愈

一婦人性多鬱怒勤於女工小腹內結一塊或作痛或  
痞悶月經不調恪服伐肝之劑

今人受此  
害者尤多

內熱寒熱胸

膈不利飲食不甘形體日瘦牙齦蝕爛此脾土不能  
生肺金肺金不能生腎水腎水不能生肝木當滋化

原用補中益氣六味地黃至仲春而愈

必舉仲春者以肝木司令

時也

松江太守何恭人性善怒腹結一塊年餘上脘蝕透血氣虛極時季冬肝脈洪數按之弦緊餘脈微弱或用伐肝木清胃火之藥薛曰真氣虛而邪氣實也恐伐肝木至春不能發生耳用八珍湯以生氣血用地黃丸以滋腎水肝脈頓退因大怒耳內出血肝脈仍大煩熱作渴此無根之火也仍以前藥加肉桂二劑脈

歛熱退復因大怒果卒於季冬辛巳日乃金尅木故也

一婦人耳下腫赤寒熱口苦月經不調小腹內一塊此肝火氣滯而血凝也用小柴胡加山梔川芎丹皮治之諸症悉退

潤州某公補劑中多用敗龜版垂十年頗健晚患蠱脹乃謁白飛霞飛霞診視良久曰此瘕也公豈餌龜版藥耶今滿腹皆龜吾藥能逐之其骨節腠理者非吾

藥所能也乃與赤丸如粒服之下龜如菽大者升餘  
得稍寬不數月死易簣時驗小遺悉有細蟲彷彿龜  
形物得氣而傳如此可不慎哉

周櫟圖  
書影

黃山畢公服溫肺臍初頗有驗久之得沙淋疾沙皆作

犬形頭尾畧具

同上

陳自明治一婦人腹內結塊久而不消與神仙追毒丸

一粒即痊

方元  
盡門

陳自明云予族子婦病腹中有大塊如盃每發痛不可

忍時子婦已貴京下善醫者悉常服有藥莫愈予應之曰此血瘕也投黑神丸盡三丸塊氣盡消終身不

復作

良方醫  
說續編

孫侯居比部病腹中若有癥瘕不食不眠煩懣身熱仲淳投水人參白芍茯苓麥冬木通棗仁石斛方甫具史鶴亭太史至見方中有大劑人參駭曰何因投參至劇此得無謬乎仲淳曰病勢先後不同當時邪未退滯未消故不宜今病久飽脹煩懣者氣不歸元也



不食者脾元虛也不眠而煩者內熱津液少也今宜  
亟用此藥矣四劑而瘳後復病仲淳診之曰此陰虛  
也非前症矣更以麥冬白芍枸杞五味生地車前而

熱遂退

廣筆  
記

立齋治黃恭人腹內一塊不時作痛痛則人事不知良  
久方蘇諸藥不應診其脈沈細則非瘡毒河間云失

笑散

五靈脂蒲黃等分為  
末醋湯調每服二錢

治疝氣及婦人血氣痛欲

死並效與一服痛去六七再服而平此藥治產後心

腹絞痛及兒枕痛尤妙

錢國賓治陳小山妻年三十二久痞成形狀如鯽魚長五寸濶寸許頭尾口牙悉具漸漸游行穿腸透膜上近喉邊下近谷道飲血咬肝聲呼痛楚形神狼狽其脈強牽尚有胃氣可治先以古方五味紫金錠磨服止痛次以煨刀豆殼一兩為君以此豆能殺痞也乳香沒藥定痛活血射香通竅木香順氣調以砂糖作餌痞受毒藥旬日內伏不動月餘而化便出如蜆肉

一堆以四物加參朮枸杞香附調理百日全安

# 痞

張文潛藥戒云張子病痞積於中者伏而不能下自外至者捍而不能納從醫而問之曰非下之不可歸而飲其藥既飲而暴下不終日而問之伏者散而無餘伺之捍者柔而不支焦膈導達呼吸開利快然若未始疾者不數日痞復作投以故藥其快然也亦如初自是逾日而痞五作五下輒下每愈然張子之氣一

語而三引體不勞而汗股不步而慄膚革無所耗於外而其中藹然莫知其所來聞楚之南有良醫焉往而問之醫歎曰子無歎是藹然者也天下之理其甚快於余心者其末必有傷求無傷於終者則初無望快於吾心痞橫於胸中其累大矣擊而去之不須臾而除甚大之類和平之物不能為也必將擊搏震撓而後可其功未成而和氣已病則子之痞凡一快者子之和一傷矣不終日而快者五則和平之氣不旣

索乎且將去子之瘡而無害於和乎子歸燕居三月而後予之藥可為也張子歸三月而後請之醫曰子之氣少全矣取藥而授之曰服之三日而疾少平又三日而少康終年而復常且飲藥不得亟進張子歸而行其說其初使人憊然遲之蓋三投其藥而三反之也然日不見其所攻久較則月異而時不同蓋終

歲而疾平

容齋  
五筆

張子和治息城司侯聞父死於賊乃大悲哭之罷便覺

心痛日增不已月餘成塊狀若覆盆大痛不住藥皆無功議用燔針炷艾病人惡之乃求於張張至適巫者在其旁乃學巫者襍以狂言以謔病者至是大笑不忍回面向壁一二日心下結塊皆散張曰內經言憂則氣結喜則百脈舒和又曰喜勝悲內經亦有此法治之不知何用針灸哉適足增其痛耳

劉子平妻腹中有塊如瓢十八年矣經水斷絕諸法無措張令一月之內洩四次下六次所去痰約一二桶

其中不化之物有如葵菜者爛魚腸之狀涌時以木  
如搯之覺病稍如刮漸漸而平及積之盡塊反窪如  
臼畧無少損至是面有童色經水旣行若當年少可  
以有子

張主簿妻病肥氣初如酒盃大發寒熱十五餘年後因  
性急悲感病益甚惟心下三指許無病滿腹如石片  
不能坐臥針灸匝矣徒勞力耳張曰此肥氣也得之  
季夏戊己日在左脇下如覆盃久不愈令人發瘡瘡

者寒熱也以瓜蒂散吐之魚腥黃涎約一二缶至夜  
繼用舟車丸通經散投之五更黃涎濃水相半五六  
行凡有積處皆覺痛後用白朮散當歸散和血流經  
之藥如斯涌泄凡三四次方愈

山東顏先生有積二十年目視物不真細字不覩當心  
如頑石每發痛不可忍食減肉消黑黥滿面腰不能  
直因遇張令涌寒痰一大盆如片粉夜以舟車丸通  
經散下爛魚腸葵菜汁七八行病十去三四以熱漿



粥投之復去痰一盆次日又以舟車丸通經散前後約一百餘行略無少困不五六日面紅黥去食進目明心中空曠遂失頑石所在旬日外來謝

杜弓匠子婦年三十有孕已歲半矣每發痛則召侍媼待之以爲將產也一二日復故凡數次張診其脈溢而小斷之曰塊病也非孕也脈訣所謂溢脈如刀刮竹形主丈夫傷精女人敗血治法有病當瀉之先以舟車丸百餘粒後以調胃承氣湯加當歸桃仁用河

水煎乘熱投之三二日又以舟車丸桃仁承氣湯瀉  
青黃膿血襍然而下每更衣以手向下推之揉之則  
出後三二日又用舟車丸以猪腎散佐之一二日又  
以舟車丸通經散如前數服病去十九俟晴明當末  
食時以針瀉三陰交穴不再旬已消矣

孫主簿李述之母患胸中痞急不得喘息按之則痛脈  
數且澁曰胸脾也因與仲景三物小陷胸湯一劑和

三劑愈

醫學  
綱目

龔子才宜吳仰泉室年五旬患腹中積塊如盤大年餘  
漸臥不倒腹響如雷噯氣不透口乾吐白沫下氣通  
則少寬五心煩熱不思飲食肌瘦如柴屢治無效診  
之六脈濇數氣口緊盛知為寒涼尅伐之過使真氣  
不運而瘀血不行與八珍粉加半夏陳皮木香厚朴  
萊菔子大腹皮海金沙三劑小便下血如雞肝狀至  
十二劑下黑血塊盆許腹中仍有數塊仍以八珍湯  
加枳實香附五劑而痊

一婦人年近三十患腹左有一大塊堅硬如石有時作痛肚腹膨脹經水不調白帶頻下夜熱脈急數以千

金化鍊丸一料塊消卽孕生一女

此方疑龔杜撰四物之外一派破血

行氣而已

李河山患腹左一塊數年不愈後食柿餅過多腹脹滿悶診之六脈洪數氣口緊盛以藿香正氣丸加山查神麴二劑而愈逾月又因飲食失節腹脹如初用煎藥勿效與行濕補氣養血湯二十餘劑始安因囑曰

病雖愈體未復完務宜謹守勿犯禁忌後數月過龔  
曰凡有病者皆天與也不在服藥謹守若顏子亞聖  
豈不能保養何短命死矣我今保養半年未見何如  
從可知也龔不能對遂復恣縱無忌未旬日忽患痢  
赤白裡急後重痛不可忍日夜無度乃自置大黃一  
劑數下無效復求診六脈洪數先與調中益氣湯二  
劑又以補中益氣湯加白芍黃連微效彼欲速愈易  
醫不審其素有痞滿之病復下之不愈又易一醫再

與下藥遂症門下脫痛如刀割腹脹如鼓此元氣下陷也當大補升提而反瀉之不亡何待

陸養愚治茅鹿門三夫人經期叅前腹中有塊升動有時作痛作脹大便秘不實脾實不和其脈人迎大於氣

口二倍

以此斷為血有餘

茅問曰此症屢服消導及養血之

藥輕則枳實枳殼木香豆仁重則檳榔稜莢俱以養血佐之藥頗中和而病反增劇何也曰據脈左盛於右氣不足而血有餘今所服不惟誅伐無過且損不

足而益有餘欲其病之不劇得乎用人參白朮陳皮  
乾薑大棗以益其氣用消痞丸以去其血之瘀其方  
用香附醋炒四兩元胡索醋炒一兩五錢歸尾二兩  
川芎紅花桃仁海石瓦楞子火煨醋淬各一兩醋打  
麵糊為丸與煎劑相間服未半料而塊已失大便結  
實經水如期

李士材治於郡守在旬下時每酒後腹痛漸至堅硬得  
食輒痛得食反痛實症無疑脈之浮大而長脾有大

積矣然兩尺按之軟不可峻攻令服四君子湯七日  
投以自製攻積丸三錢但微下更以四錢服之下積  
十餘次皆黑而韌者察其形不倦又進四錢於是腹  
大痛而所下甚多服四君子湯十日又進丸藥四錢  
去積三次又進二錢而積下遂至六七椀許脈大而  
虛按至關部豁如矣乃以補中益氣調補一月全愈

攻補互  
施法

王工部鬱成痞形堅而痛甚攻下太多遂泄瀉不止一



晝夜計下二百餘次一日之間肌體骨立神氣昏亂  
舌不能言已治未待斃李診之曰在症雖無活理在  
脈猶有生機以真臟脈不見也大虛之後法當大溫  
大補一面用枯礬龍骨栗殼樗根之類以固其腸一  
面用人參二兩熟附五錢以救其氣三日之間服參  
半斤進附二兩瀉遂減半舌轉能言更以補中益氣  
加生附子乾薑併五帖爲一劑一日飲盡就進藥而論則胃能  
納受如是者一百日精旺食進瀉減十九然每日夜

猶下四五行兩足痿廢用仙茅巴戟丁附等爲丸參附湯並進計一百四十日而步履如常痞瀉悉愈

姚氏婦久患痞積兩年之間攻擊之劑無遺用矣而積未盡除形體尪羸李曰積消其半不可伐矣但用補劑元氣一復病自祛耳遂作補丸服畢而痞果全消踰三年調理失宜胸腹痛甚醫以痛無補法用理氣化痰之劑痛不減脈之大而無力此氣虛也投以歸胃湯加人參二錢其痛立止

喻嘉言治袁聚東年二十歲生痞塊臥牀數日進化堅  
消痞之藥漸至毛痺肉脫面鰲髦卷殊無生理其塊  
自少腹臍旁分爲三歧皆硬如石按之痛不可忍脈  
只兩尺洪盛餘俱肥細謂初時塊必不堅以峻猛之  
藥攻至真內亂轉獲邪氣爲害其實全是空氣聚成  
非如女子月經凝而不行卽成血塊之比觀兩尺洪  
盛明是腎氣傳於膀胱誤施攻擊其氣不運結爲堅  
塊故按之則愈痛也虛症亦有按之而愈痛者姑用

補補中藥一劑以通中下之氣然後用大劑藥內收  
腎氣外散膀胱之氣約三劑可全愈矣先以理中湯  
加附子五分一劑塊減十之三再用桂附一大劑腸  
中氣响甚喧頃之三塊一時頓沒再服一劑果全愈  
更用補腎藥加桂附多用河車爲丸以善後

馮楚瞻治戚氏婦腹中有塊作痛發則攻心欲死上則  
不進飲食下則泄瀉無度醫藥三百餘劑不效脈之  
六部沈細已極右關尺似有似無明係火衰土弱腎

家虛氣上凌於心脾土不能按納奔豚之氣非溫補  
不可用炒乾熟地八錢補水以滋土炒黃白朮六錢  
補土以固中炮薑熟附各二錢補火以生土更入五  
味子一錢以斂之俾祖氣有歸臟得其藏而腎乃納  
而不出也數劑而安一月全愈

琇按馮公此案前人所未發字字如良玉精金後  
賢宜三復之

吳孚先治一人患痞前醫用攻藥已去六七適前醫他

往吳與湯丸俱係參朮補劑病者云去疾莫如盡奈何而留之吳曰正所以盡去其疾也經曰大積大聚衰其半而止此前醫之用攻也又曰補正則邪自除此余之用補也若必盡攻則痞去鼓脹成是欲盡去其疾而反益其疾矣乃遵服不間而痊

張路玉曰顧晉封室患痞在脇下或令用膏藥如阿魏一分麝半分貼之五六日間遂下鮮血血塊甚多二三日方止是後每歲當貼膏時必發近隣嫗亦用阿

魏膏貼痞下血如前世以阿魏麝香爲痞塊必用之藥外用爲患若此况服食乎因爲拈出以爲虛人漫用攻擊之戒

韓貽豐治脊中翰如穎病數日二旬不食矣已治木韓視之氣色如灰聲低喉澁瞳神黯然無光私語其子曰此甚難治病者覺之乃哀懇曰我今年六十七矣卽死不爲夭但遇神針而不一用而死死且不瞑目我生平好酒而不好色幸爲我下一針於是乃勉爲

用針令臥牀坦腹拊其臍下有一痞周圍徑七寸堅硬如石乃以梅花針法重重針之又針其三腕又針其百勞百會皆二十一針針畢令飲醇酒一盃乃搖手曰惡聞酒氣以兩月矣強之初攢眉旣而滿引如初

楊乘六治朱氏婦病胸膈痞悶兼寒暑往來口乾作渴飲食不進服寬利清解藥益甚脈之右關弦數而沉面色帶紅舌乾微黃乃與益陰地黃湯或曰胸滿不



食累月矣二陳枳殼尚不能通地黃山藥五味萸肉  
俱酸滯陰滯之物其可投乎曰此症本因肝胆燥火  
閉伏胃中其原則由於腎水之不足蓋腎者胃之關  
也水不足則火旺熏蒸而胃陰虧胃與肝膽多相並  
且爲其所勝又腎旣不足則肝胆之木無水以養而  
燥火獨熾於是乘其所勝之虛而入之且冲於上則  
口乾咽燥流於下則二便秘急塞於中則爲胸浮弦  
而關更甚右手沈細而關則帶滑此肝木有餘脾血

不足之候也與疎肝助脾調氣養血則火降鬱開而痰自內消矣用調氣養榮湯加陳皮前胡佐茯苓消痰止嗽青皮香附豆仁白芍疎肝寬腸總之氣得川流則血自津潤數劑後用潤字丸間服每次五分十日症遞減改用六君子改養血調氣藥蓋邪之所湊其氣必虛壯者氣行則愈弱者著而成病也後以純補間用調氣治嗽之品五旬始痊

陳三農治一少年體薄弱且咳血左邊一塊不時上攻

作痛左金蘆薈俱不應診其脈三部雖平而細澀不  
流利因作陰虛治四物加知柏元參丹皮鱉甲數劑  
頓愈

盧絳中

去聲

痞疾忽夢一白衣婦人謂之曰食蔗卽愈詰

朝見鬻蔗絳揣囊中且乏一錙唯有唐山一冊遂詣  
易之曰吾乃負販者將安用此哀用欲之遂貽數挺  
絳喜而食之至旦遂愈

野史

琇按本草蔗能治虺虺能令人痞脹盧病迨是虺

作楚耳故食之卽愈

張子和治顯慶寺僧應公有沈積數年雖不臥牀枕每於四更後心頭悶硬不能安臥須起行寺中習以爲常人莫知爲何病以藥請於張張曰令涌出涎膠一二升如黑砒水繼出綠水又下膿血數升自爾胸中如失因出飲餌無算安眠至曉

一婦人小腹中有塊其脈濇服攻藥後脈見大以四物湯倍白朮陳皮甘草爲佐俟脈充實間與硝石丸兩

月消盡

至正二十五年夏六月里人周伯安病積氣右脇下喘  
且脹者五閱月醫來類補以溫熱之劑病日劇幾殆  
矣陸君祥往視之曰是怠責也法當大下內經所謂  
留者攻之土鬱奪之者也積氣責門邪未去其可補  
乎從之不終日而愈

強齋集

汪石山治一人年逾三十形瘦蒼白病食則胸膈痞悶  
汗多手肘汗出尤甚多四肢倦怠或麻晚日若遲未

早必泄初取其脈浮軟近駛兩脈洪乃略大曰此脾虛不足也彼曰嘗服參朮膏胸膈亦覺痞悶恐病不宜於參耆曰膏則稠粘難以行散故也改用湯劑痞或愈乎用參耆各二錢白朮錢半歸身八分枳實甘草各五分麥冬二錢煎服一貼上覺胸痞下覺失氣彼疑參耆使然曰非也若參耆使然則當身痞不當失氣恐由脾胃過虛莫當枳朴之耗也宜除枳朴加陳皮六分再服一貼頓覺胸痞寬失氣除精神爽埴

脈皆軟緩不大亦不駛矣可見脾胃虛者枳朴須散  
用爲佐使況有參耆歸朮爲之君尚不能制然則醫  
之用藥可不慎哉

張景鵬治金孝廉以勞倦傷脾別無他症但痞滿不食  
遂用參朮歸附桂薑甘草之屬半月始愈後因病後  
復不食如此自必死仍用前藥而安

錢國賓治王元直父腹左一痞形如鏡大視之乃鏡痞  
也生於皮肉肉上可治以三品膏巴豆葶麻子肉各

四兩杏仁一兩黃丹八兩香油一斤二兩熬膏藥貼  
二十日一日一換出膿一二椀內服參耆托裏月餘  
收口而愈

蔣仲芳治陳氏婦年廿六生癰塊已十年在臍上月事  
先期夜則五心發熱火嘈膨悶忽一日癰作聲上行  
至心下則悶痛欲絕爲針上臍癰下而痛定然臍旁  
動氣不怠復針天樞穴動氣少止遂用當歸五錢白  
芍白朮延胡丹皮川芎條芩各一錢枳實官桂檳榔




木香各三分醋炙鱉甲二錢水煎空心服至二十劑而愈

聶久吾治劉氏妹稟氣怯弱性情沉鬱年三十病晚間發熱天明復止飲食少進煩燥不安肉削骨露醫藥不效診其脈歇至因其煩燥發熱頗用芩連知柏等涼劑雖無效亦不覺寒涼第恐多服傷胃則無生機矣因細問其熱從何處起曰自右脇一團先熱遂致遍身乃悟此必氣鬱痰結而成痞塊胸膈壅滯遂燥

熱氣結而脈亦結此脈與症合不足憂也當先攻痞  
以除其根則諸症自愈因用磨痞丸每日服三次服  
至三四次而塊消其半熱漸退至七八兩塊熱盡除  
不數月全安矣當其痰凝氣滯痞結右脇不惟醫者  
不知而病者亦不覺也非察其病根而拔去之何能  
取效也三稜莪朮皆醋炒花粉大黃酒炒製香附各  
八錢檳榔黃連姜汁炒黃芩酒炒枳實炒貝母連喬  
各六錢山卮前胡青皮醋炒延胡索各五錢廣皮四

錢南木香二錢鬱金三錢爲末先用竹瀝酒潤次用  
粘米粉攪硬糊丸萊豆大每服百丸

按此案與痰門陸養愚治董潯陽夫人脈症俱同  
而方異大凡陸按乃剽襲耳今此案入痞門者俾  
知痞症有痰結一端也



續名醫類案卷十三